

Tumando na cuenta e necesidad di e comunidad

Minister di Cultura Otmar Oduber kier mira mas proactividad den barionan

DURANTE un conferencia di dialuna mainta Minister di Turismo, Transporte, Sector Primario y Cultura Otmar Oduber a duna informacion amplio riba e solucion pa loke ta trata Fundacion Desaroyo Educativo Comunitario (FDEC).

FDEC ta un fundacion cu a wordo funda 18 aña pasa cu a cuminsa cu e meta pa duna cursonan di musica y arte den 6 districto di Aruba pa duna empuhe na desaroyo di talento, creatividad y desaroyo individual y ta haya 90% di nan entrada for di caha di Gobierno. Mirando con

a hunga cu e statuto y meta di e fundacion aki den pasado, ta loke a hiba e fundacion aki unda e ta awe.

Minister Oduber ta splica cu e motibo principal di e conferencia di prensa tabata pa duna informacion riba e situacion di

FDEC, unda for di mei e aña aki, a manda un carta na e fundacion aki indicando cu lo no prolonga e subsidio mas. desde 1 di september 2014. Esaki pa motibo di e diferente puntonan cu no ta cana bon.

Den un carta manda pa e bestuur di FDEC na mei, a muestra

nan riba e conclusion basa riba e diferente encuentronan cu bestuur, cu a indica na diferente ocasion cu tin diferente aspectonan cu lo no ta canando bon. Bestuur di FDEC a muestra Minister di Cultura riba e hecho, cu no por a cambia e diferente aspectonan cu no ta bayendo bon pa motibo cu no a haya sosten di e otro Gobiernonan di e tempo ey y tampoco no tabatin e boluntad di esnan cu ta forma parti di e fundacion, pa asina trece cambio na loke bestuur no tabata di acuerdo cune.

E mandatario a splica cu di su banda como Minister di Cultura e no ta haya corecto pa sigui traha cu un fundacion cu no ta contento pa traha di e forma aki y cu no ta cumpli cu e meta principal di nan statuto.

Minister Oduber ta splica di a yega na un acuerdo mutuo cu e bestuur di FDEC, pa desolve e fundacion aki despues di un di dos reunion manera ta prescribi den nan statuut.

Den futuro Minister Oduber kier mira mas proactividad den barionan, cu lo logra alcapara hopi mas hoben pa participa cu un programa den barionan. Asina aki brindando hopi mas posibilidad na disciplina, tumando na cuenta e necesidad di e comunidad.

Cu esaki nos kier desgarta e rumornan, cu no ta Gobierno mester spaar placa, sino mas aun nos ta mira den e direccion cu Gobierno lo inverti e placa aki den proyectonan existente cu ta carga e mes un meta y asina aki crea union den diferente fundacionnan pa asina aki ofrece mas posibilidad na nos hobennan den diferente barionan, Minister Oduber ta bisa. E mandatario ta splica cu esaki ta un di e resultadonan danki na e Cumbre Nacional di Cultura y cu nos mester cuminsa mira den e direccion pa amplia e programma di cultura y arte den barionan pa asina yega na mas mucha y hoben cu nunca a haya e oportunidad pa participa cu cursonan.